



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

Tir Yimiyim

tiryimiyim@aolima

tir yimiyim

TAPAK 10



Kim Jong Un-i North Korea rongsenketsung ajungketsu nangzuk



Virat Kohli-i 'Test' asayamung nung alizung tasen ka tongtet

VOL. XVIII NO. 246 (ADOK 246) DIMAPUR

AMUNGNÜ (SUNDAY)

AAMI (JUNE) 20, 2021

₹ 5.00

## Kohima DTF-i Covid-19 tensa meyipa repringshi



Kohima District Task Force (DTF) on Covid-19 senden ka online ajanga amenbo noksa nung angur. (Kohima, June 19, 2021)

**Kohima, June 19, 2021 (TYO):** June 19, 2021 nü Kohima District Task Force (DTF) on Covid-19 senden ka online ajanga menogo.

Iba mapang DTF-i Kohima district nung nikongdang 4:00 ako nungi anepdang 5:00 ako tashi temelaba malirtem shinga mesenzüdaktsüsü nenshia metetdaksü.

Senden nung Kohima district nung Covid tensa meyipa repringshi aser idangji lockdown ajanga tajanzük anguba lemsatop.

Kohima nung tensa tajungba küma arur aser maneni sorkari latetba lockdown inyakyim akangkanga beshitsü ta DTF-i teletmetba agi.

Kohima nung vaccine agütsüba maparen tuluba inyaker aser ibaji medical team-i outreach sessions talila agiba ajanga lir. District nung urban aser rural tesem ajak nung vaccine agitsüpur ajak atongtsü alizung yua aliba atongtsü atema mapa inyakdar ta DTF-i metetdaksü.

Senden nungsa KCCI-i dokan talila kar lapoktsü asüngdangba benoka jembidang sorkar lapoktsü melaba dokantem dang lapoka atatsü atema DTF-i teletmetba agi.

Talenbatem salara nisung talila senzüsenbongtsü aser iba ya tebilemtsü ka lir anungji tensa tajungba kümra dokan talila lapoktsü atema HPC dangi abentsü ta DTF-isa lemtet.

Tanü sendenji Deputy Commissioner aser DTF Kohima Chairman, Gregory Thejawelie, NCS lenisüba kübok amen.

Senden nungsa Kohima district atema Minister in-charge, PWD (Housing and Mechanical) Minister Tongpang Ozukum den Urban Development & Municipal Affairs Advisor Dr. Neikiesalie Nicky Kire aser Technical Education and Election Advisor Medo Yhokha na den Sr. S.P Kohima, Kevithutuo Sophie, CMO Kohima, Dr. Vezokholu Theyo aser tanga DTF zungsemtem aden.

## Nagaland nung total lockdown shilem tasembuba tenzükogo Nisung 24,191 nungi 21,058 taneptsü nguogo; 1,979 anepalur

**Kohima, June 19, 2021 (TYO):** Honibar nungi Nagaland nung total lockdown shilem pezübuba tenzükogo aser külen tanü agi anogo 13 buba atongtepa COVID-19 puteter dang nungibo taneptsü angur timba liasü.

June 16, 2021 nü Chief Minister Neiphiu Rio menden ser High Powered Committee on COVID-19-i June 30 tashi total lockdown atsülangtsü teletmetba agia liasü.

Nagaland nung daily case positivity rate 5% teküpok aludaktsüsü nükjidong nung parnoki iba teletmetba agi.

Tanü tashi nung daily case positivity rate 8.37% aser overall positivity rate 11.29 lir.

"Honibarnü nisung 94 dak COVID-19 putet. Parnokji Dimapur nung 32, Mokochung nung 18, Kohima nung 12, Peren o Tuensang nung terkaka (11), Phek nung 9 aser Wokha nung 1

lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Maneni tanü nisung 171 taneptsü angur. Parnokji Dimapur nung 98, Mokochung nung 42, Kohima o Zunheboto nung tii (8), Tuensang nung 6, Wokha nung 3 aser Longleng, Mon o Phek nung anana (2) lir. Parnok zungsema taneptsü angur ajak agi 21,058 kümogo" ta pai metetdaksü.

Iba ajanga taneptsü angur 87.05% kümogo aser tang Nagaland nung nisung 1,979 anepaludar, ta paisa ashi.

Tanü Kiphire nung COVID-19 puteta alir ka asüba zungsema tasür ajak agi 468 kümogo, saka nisung 14 bo tanga tashidak ajanga asü, ta Dr Kikon-isa ashi.

"Nagaland nung COVID-19 alitsü akok ta temolung melemi bilemba sample 2,14,131

tendangogo. RT-PCR ajanga 95,308, TrueNat ajanga 59,696 aser Rapid Antigen Test ajanga 59,127 tendang" ta Dr Kikon-isa ashi.

"Hokolbar tashi nung Nagaland nung nisung 3,43,830 nem COVID-19 vaccine indang dose 3,99,141 agütsüogo" ta State Immunization Officer Dr Ritu Thurr-ia metetdaksü.

Vaccine agirtemji frontline workers 59,883, healthcare workers 15,753, arishi küm 45 ser temapur 1,37,601 aser arishi küm 18 nungi 44 tsüngda alir 1,30,593 lir, ta paisa ashi.

"Vaccine agirtem rongnungi nisung 55,311-i dose anaprong agiogo. Parnokji frontline workers 28,331, healthcare workers 10,352, arishi küm 45 ser temapur 16,627 aser arishi küm 18 nungi 44 tsüngda alir ka dena lir" ta Dr Thurr-isa metetdaksü.

## Hopta 6-8 tsüngda Covid-19 wara tasembuba atongtsü: AIIMS Director

**New Delhi, June 19, 2021 (Agencies):** India nung taruba hopta 6 nungi 8 tsüngda Covid-19 wara shilem tasembuba agi atongtsü akok ta AIIMS director Dr Randeep Guleria-i ashi.

"Asenoki lockdown tenokdangbatem salar aser tanga COVID anema inyakyimtem mebenshir. Mezung aser tanabuba wara nungi asenoki kecha mangazük ama bilemer kechiyong nisung lokti adenshir" ta Dr. Guleria-i ashi.

"COVID wara tasembubaji mepaidoktettsü aser taruba hopta 6 nungi 8 mesüra iba sülen India nung atongtsü" ta pai ashi.

"Asenoki wara tulu noktangtsü atema vaccine agütsüba maparen tuluba nung inyaktsü nüngdaker. Ajisüaka, national-level lockdown ajanga wara mazüoktettsü aser asenoki rongsenkettsung maparen asoshia bilemtsüla. Nisungtem dak tali putetra, item tesemtem nung jungjunga tenük yoktsüla aser lockdown asütsüla" ta Dr. Guleria-isa metetdaksü.

Delhi nung shishilembadak Covid inyakyim sülen manidaker ta Delhi High Court-i ashiba sülen anogo ka lir Guleria-i iba osang metetdaksüogo.

Maneni, Delta Plus Covid

variant bushitetba sülen Guleria-i wara tasembuba indang shiogo.

Tan hopta tetenzüklen New Delhi nung scientist temi SARS-CoV-2 indang Delta variant bushiteta liasü. Iba ya India nung mezung angu aser 'Delta Plus' mesüra 'AY.1' variant akümtsüsa tashi tuluba kümogo.

Tesüiba ghonda 24 tsüngda India nung nisung 60,753 dak COVID-19 aliba putet aser kasa mapang nisung 1,647 asü.

Tanü tashi nung India nung nisung 2, 98, 23,546 dak Covid putetogo aser nisung 3, 85,137 süogo.

## AIBELLEN NANGZÜKER

Ni Mr. **Chubasashi** asür Mr. Waluniba'er jabaso Nokpu nunger Island Colony, Dimapur nung alir. 16.6.21 anogo nung ni koba video ajanga Ao Senso Telongjem Dimapur-i Aor timtemer nem agütsüba jang aija whatsapp nung prokshibaji ni mejangjai inyak ta ASTD aser nübur ajak dang tai ta nangzük. Iba jangji ASTD Covid Relief jang masü ta jangjaogo aser ni aibelenba asoshi yimdeni ken o angadanger kü tai yari temerenshi agütsüogo aser aji shidak ta ni temulongsentsü ajak agi nangzük.

Sd/-  
**Mr. Chubasashi**

## Assam nung sorkar scheme atema '2-child policy' amshitsü

**Guwahati, June 19, 2021 (Agencies):** Assam nung tanur ana atema aliba kibongtemi state sorkar scheme indang tajanzük mangutsü ta Honibarnü chief minister Dr. Himanta Biswa Sarma-i metetdaksü.

Assam sorkar indang scheme kar nung 'population control' inyakyim tenzüksü

teletmetba agiogo, ta pai ashi.

"School nung admission mesüra Pradhan Mantri Awas Yojana atema tanur ana inyakyim mebenshitetsü saka CM Awas Yojana tenzükra, iba inyakyim beshitsü" ta CM Sarma-i ashi.

State sorkari tetsür education atema mapa inyakba AIUDF

tanishir Badruddin Ajmal-i pelaa agizükogo, ta paisa ashi.

2019 küm Assam sorkari tanur ana tema aliba nisungtem nem sorkar mapa magütsütsü teletmetba agia liasü.

"January 1, 2021 nungi tanur ana tema alir nem sorkar mapa magütsütsü" ta Assam state sorkari metetdaksüogo.

## ASENOK MOZÜ KITEM ASER YANGJI TEYARI ANGÜTSÜBATEM INDANG METETDI ( SHILEM-IV)

Ano National Health Mission sentong ajanga nübertem anisungzük tulu angütsüsa teyari agütsübaji shirangertem belentsü atema ambulance gari angati agütsüba ya asütsü. Iba ambulance teyari agitsü atema telephone number 108/ 102 amshir. Telephone number 108 ji ajanga kanga koda masü timtemba aser accident lendong nung yiruyipongertem yaritsü asoshi ajar aser telephone number 102 ji tetsür tanur bona alirtem aser timtemer tanurtem asoshi teyari nüngdak dang amshitsü yutsür. Ambulance gari nungji shirangertem anepalutsü atema Basic Life Support (BLS) aser Advance Life Support (ALS) osettem ajak alitsü atema sen agütsür. BLS aliba ambulance nung senzüsübaji Emergency Medical Technician ana alitsüla aser ALS ambulance gari atemaji Emergency Medical Technician den Paramedic ka alitsüla aser ambulance nungji airway equipment, cardiac life support, cardiac monitors aser glucose tendangba osettem alitsüla. Item ambulance ayutsü atema Nagaland nem 2015-16 küm sen lakh 20.56, 2016-17 küm sen lakh 122.26, 2017-2018 küm sen lakh 100.68, 2018-2019 küm ALS ambulance tasen 4 atema sen lakh 250.82, 2019-20 küm sen lakh 48.66, 2020-2021 küm sen lakh 65.74 agüja liasü aser 2021-2022 atema sen lakh 98.41 lemezükja lir. 2019 küm September ita tashi nung Nagaland government ket nung ambulance tamshidak 82 liasü. Ibaaji <http://164.100.24.220/loksabhaquestions/annex/173/AU2636.pdf> nung angutsü.

[Iba osang ya Wt.Limatula Yaden, shiba DGHRD, Central Board of Indirect Taxes & Customs, New Delhi nung tang Additional Director General lir aser taoba küm 6 tashi Ministry of Health & Family Welfare, Govt. of India nung NHM Policy Director liasü, lai yokba nungi nübertem ajanzüksü asoshi adoktsür.]

# H&FW Minister, Pangyu Phom-i Longleng semdang



June 19, 2021 nü Minister for Health & Family Welfare S. Pangnyu Phom den ketdangsertem-i Longleng semdangba yangi noksa nung angur.

**Dimapur, Aami/June 19 (TYO):** Minister for Health & Family Welfare S. Pangnyu Phom den Secretary, H&FW-i June 19 nü Longleng semdangogo. Longleng semdangba mapang ketdangsürtemi District Tasks Force, lokti tentet balala aser Arogo tem den DC office complex, Longleng nung Covid-19 tensa asadangba senden ka mena liasü.

Senden nung o jembiba mapang Pangnyu Phom-i, tensa asadangsü nükjidong nung pai district semdang ta ashi. Paisa, tashidak mezüing poktetba dang nungi tanaben poktetshiba mapang linük nung medical facilities agi anüingba agi masü saka shirangertem zübazülemba ajanga nisung aika süogo, ta ashi.

Phom-isa, Deputy Commissioner, district administration, Police, medical personnel, VGs, NGOs, lokti tentet balala aser Arogotemi anir District Tasks Force-i, wara den raraba mapang kibong ka ama longjemer inyakba ajanga state nung district tem rongnung

Longleng nung tashidak kanga junga azüoktetba atema parnok nem tenüngsang agütsü. Paisa, district nung mapang lemzüka aliba sorkar ketdangsür aser staff tem dang tensa majungba mapang medical department aser nüburtem nem teyari agütsütsü mepeshia metetdaksü.

Kasa mapang nung Minister-i, Centre sorkar tetuyuba dak ajemdaker tashidak menar shilem 5 teküboki malu tashi state maneni mokdanga ayutsü ta metetdaksü, aser ashiba agi, state nung tang tashidak menar shilem 9.3 lir.

Wara den raratsü atema sorkari health sector dak tali rangloker inyakdar ta shia pai, state nung nüburtem nem service tajungtiba agütsütsü atema health care facility tem ajungkettsü asoshi PDA sorkar bendanga agütsür lir, ta ashi.

Maneni pai, state kübok sub-center ajak nem agütsütsü atema pulseoximeter aser oxygen concentrator amala medical tsütsü tenüngdakattem osettem alitsü asoshi LADP

nungi shilem 10 aser common pool nungi shilem 15 agizütsü atema sorkari telemtetba agiogo, ta ashi. Iba dak sendakba nung pai DTF dang district nung tenüngdakattem asadangsü tetuyuba agütsü.

Senden nung Deputy Commissioner, Longleng, M. Shayung Phom-i lokti pelaa agizükba o jemi aser Senior Superintendent of Police; Secretary H&FW, Wezope Kenye, IAS; Joint Director H&FW, Dr. Kikameren; CMO Longleng, Medical Superintendent Longleng, Dr. Imnameren, PPC nungi ketdangsür, PSC tir aser Tamlu sub-division tenüng nung EAC Tamlu, Khriethozo Pfkri nungeri o tatsütsü jembia liasü. Iba senden ya EAC Longleng, Pichano Kikon lenisüba nung agia liasü.

Pangnyu Phom aser pa sülen anidakba ketdangsürtemi District Hospital semdang aser doctor aser nurse tem den senden mena liasü. Paisa, Isolation Home, Community Care Centre aser tang yanglua aliba sub-jail semdanga liasü.

# Razeba nung public awareness cum training sentong agi

**Dimapur, Aami/June 19 (TYO):** Razeba range atema Covid-19 dak sendakba inyakyimtem nung public awareness cum training sentong ka June 19 nü ayongzüka agiogo. Iba sentong ya ADC

Pfutsero, Japheth Woch, MO Razeba, Dr. Kuolo aser MO CHC Pfutsero, Dr. Bentilo nunger lenisüba nung agia liasü.

Iba sentong nung Razeba aser temeket yimtsüngtem nungi lokti lenirtem, VCM tem

aser police tem dena liasü, kong Covid-19 SOPs, vaccine agiba sentong dak sendakba nung temetetsütem metetdaksüba den PPE donning/doffing training aser tasüngmang anepaluba yimya sayua liasü.

# Lengrijan LVC-i AR dang pelaba lemsatep



**Dimapur, Aami/June 19 (TYO):** Lingrijan yimtsüng kübok alir anogoshia ayaa chiyonga alirtem nem tenüngdakba oset balala agütsüba atema Lengrijan Villlage Council (LVC)-i 5 Assam Rifles, 99 APO, Firing Range Dimapur dang kanga pelaba sangdong ka ajanga lemsatepogo.

anogoshia ayaanga chiyonga alir kija aser kibong 100 nem lemsütsü atema June 18 nü Lengrijan Council Hall nung Lengrijan Village Council nem chiyongsü balala agüja liasü. Council-i item chiyongsütem kija aser kibong balala nem lema agütsüogo, ta kasa sangdong ajanga metetdaksü. Covid-19 wara ajanga lokti ajung dak kongshio aser

talisa anogoshia ayaa chiyonga alirtem dak kanga mejungi kongshio. 5 Assam Rifles-i mulungso tenla agütsüba ajanga kanga dang nüngdaka aliba kibongtem nem teyari tulu agütsüogo, ta LVC mendenbuba T. Anung Pongen aser tezülur Ayimsalag Longchari nati külem sangdong ka ajanga metetdaksü.

# Kohima DC-i taxi anishirtem atema tetuyuba talila kar agütsü

**Kohima, Aami/June 19 (TYO):** Deputy Commissioner Gregory Thejawelie-i, gari anishir aser gari nung amenertem kümzüka toktsütsü atema public transport inyakyim dak sendakba nung tetuyuba talila kar agütsüogo.

DC-i, taxi tem nung passenger anana anitsü temelaba agütsüba metetdaksüogo, ajisiuka gari tejaklen passenger memendaksütsü aser passenger tem mask mesemi senüzüa aliba ngutetra aibelener aser iba taxi anishir naprongla dang senchi sen 200 achitsü, ta metetdaksü.

Taxi anishir-i nübur anir senzüba shia door knobs, door handles amala nüburtemi teti kongshia aliba tesemtem mapangshia merekteta alitsü aser gari nung hand sanitizers teti yua alitsüla, ta kasa sangdong ajanga metetdaksü.

Gari anishirtem indang negative COVID-19 test report ya RAT/RTPCR /TrueNat/CBNAAT ta mashi ka nung tendangba agitsü aser tashidak angati agi tendangsü. Vaccine agitsü mulunga aliba gari anishirtemi pai tenüng RTO nem agütsütetsü, aser jenjang tapet agitsü atema RTO-i nisungtem tenüng Chief Medical Officer, Kohima nem agütsütsü.

Gari anishirtem shirnok Covid vaccine dose anaprongla agiogo, parnok clause (d) nung temalen shisema aliba tetuyuba agi malentsü. Gari anishirtemi vaccine agiba certificate copy ka mapangshia bener senzütsüla. Vaccine magiteti lira gari anishirtemi COVID-19 negative test result (validity anogo 15) bener senzütsüla. Ajisüuka gari anishirtemi driver aser passenger na tsüingda gari nung plastic barrier/sheet inoka lira, item gari anishirtem atema COVID-19 test report nüngdak mali, ta DC-isa metetdaksü.

Gari anishirtem adenshia kazüba aser taxi anendak longsotepba khenyongi memelatsü aser gari anishirtem kar dak danga COVID-19 tashidak keta aliba temaitsü; aketba, temang metaba, kecha mechidangtetba aser memenemetba amala temaitsü sayura lokti nungi pilaa alitsü nüngdaker.

DC-isa, iba tetuyuba sülen manidakertem ajak Indian Penal Code Section 188 aser Disaster Management Act, 2005 dak ajemdaker tapet temerenshi agütsütsü, ta metetdaksüogo.

Maneni DC-i, item tetuyuba benoktsü atema Regional Transport Officer, Kohima nem nongloktsüogo aser item tetuyubattem ya osang agütsüba anogo, June 17 nungi benoka inyaksangshitsü ta ashi.



DC Mon, Thavaseelan K-i June 19 nü DC office, Mon nung anogoshia aayangertem nem teyari agütsüba sentong ka tenzüksüba noksa nung angur. Osettsüsettem ya DDMA-i lemja liasü.

# AR-i career counseling sentong ka ayongzüka katsü

**Dimapur, Aami/June 19 (TYO):** HQ IGAR (North) kübok Assam Rifles Jalukie Battalion-i, Peren District kübok New Mpai village nung June 18 nü career



counseling aser sensaksem sentong ka ayongzüka katsüogo. Yimtsüng nung aliba lanurtem nem mapa balala inyaksü atema lenmang sadema lapoka aliba indang tangzüka agütsütsü nükjidong nung iba sentong ayongzüka agi. Yimdak ketdangsürtem den sendaktepa Assam Rifles-i,

lanurtem nem Women Military police entry, Indian Army recruitment, hotel industry nung mapa balala aliba indang metetdaksü. Item mapa balala inyaksü jangrartem atema lenmang bushitsütsü asoshi züngoksema yuogo. Iba sentong nung tetsür 4 aser tebur 13-i shilem agia liasü.

# KÜM PUNGO JAKDANG

TSÜNGREMI NA PAR KIDANGI AJABA ANOGO

20.06.2021

REV.LANO LONGCHAR BILEMTETER

Tangaribo tasübai ajak melenshitsür ta ashir.

Temulung shiranger aser jashir.

Saka na maliba agi

Onok dang mapa aika sayur.

Na onok den taküm meliaka,

Na dena aliba onoki meteter.

Nü temeim, Nü tesayuba,

Aser nü ajemalu jakla agi onok len anir.

Anogo shia teimla nung,

Na bilemteta tepela nung amonger.

Lenmang tajung aika nung

Nai onok nem tangatetba agütsür.

Na onok anasa lia,

Onok mulung süngzükja,


Na melii onok otettsüsa

Tashi tasen agütsüba onoki meteter.

Anungji na asüba agi kecha memelenshitsür !

Kechiyong onoki teti na bilemer

Aser onok mulungjang nung na teti lir.



Temeim kinungtsü aser kinungertem.

## Assam sorkar mapa inyaker temi electricity bill agütsüba sülen ang itasen angutsü

**Guwahati, June 19, 2021 (Agencies):** Assam sorkar mapa inyaker temi mapang shitak nung itasen angutsü atema electricity bills mapang nung menoktsüla.

Iba atema state ketdangsurtemi yakta tetuyuba ka agütsütsü.

Assam chief minister Himanta Biswa Sarma-i state nung power sector nung temelenshi bener arutsü atema temolung agütsür.

Assam chief minister-i tetuyuba ka agütsüba sülen June 6, 2021 nü Assam Power Distribution Company Limited (APDCL) nung managing director-i additional chief

secretary tem, principal secretary tem aser department ajak nung commissioner & secretary dangi shidi ka zülü.

"Drawing & Disbursing Officers (DDOs)-i June 30, 2021 matongdang sorkar mapa inyaker nungi "No dues payable against electricity bill of APDCL" certificate bendentsü mepishir" ta APDCL managing director-i Assam sorkar nung tongti ketdangsur ajak dang ashi.

"Electricity bill agütsüba kuli atema APDCL system generated payment receipt amshitsü akok" ta paisa ashi.

Gujarat nung sorkar mapa inyaker temi indang itasen nungi metering, billing, electricity bills

collection & power bills agiba ama asenoki mapa tenzüktsüla, ta tawa tu Assam chief minister Sarma-i power department ketdangsurtem dang shia liasü.

CM Sarma-i power department aser parnok indang company asem Assam Power Distribution Company Limited (APDCL), Assam Electricity Grid Corporation Limited (AEGCL) aser Assam Power Generation Corporation Ltd nung den senden ka amen.

Gujarat nung power company tem ama taruba küm 5 tsüngda Assam nung company aseme tajangzük angutsü lenmangtem bushiteptsüla ta paisa ashi.



Assam aser Arunachal Pradesh Police-i National Liberation Front of Bodoland (NDFB) indang training camp ka raksatsüba noksa nung angur. NDFB indang tesepeji Arunachal Pradesh nung Assam arrtsü anasa Pakke-Kessang district nung liasü. Assam aser Arunachal Pradesh Police nungi commando 300 temai iba mapa nung shilem agi.

## East Khasi Hills DC anema züluba atema nisung ka apu

**Shillong, June 19, 2021 (Agencies):** Facebook nung East Khasi Hills deputy commissioner anema o jembiba atema nisung ka puogo.

East Khasi Hills Police indang special cell-i West Jaintia Police teyari agia arishi küm 38 tain tebur ka apu.

Facebook nung iba osang ya adokba ya social media sabang balala nung kanga prokshia liasü.

"Donlad Shylla ta ser nisung kati Deputy Commissioner, East Khasi Hills anema o zülü" ta East Khasi Hills superintendent of police Sylvester Nongtnger-i ashi.

Facebook post nung ajemdaker June 17, 2021 nü FIR ka benok aser iba sülen East Khasi Police indang cyber cell-i bushisüngdanga aru.



Honibarnü West Jaintia Hills kübok Nongjngi yim nung Donlad Shylla apu. West Jaintia Hills Police nungi teyari ngua East Khasi Hills indang special cell-i pa apu.

"Pa okadaki anir aotsü aser maneni tatembang ka matong tashi bushisüngdangtsü" ta East Khasi Hills superintendent of police Nongtnger-isa ashi.

## Tripura nung school kaketterm alemtsü

**Agartala, June 19, 2021 (Agencies):** Tripura sorkari academic session tasenba tenzükä aotsü atema June 21 nungi class 1 nungi 12 tashi kaketterm alemtsü.

Ajisüaka, state nung nisung aika dak Covid-19 putetba ajanga school tembo melapoktsü.

"June 21 nungi class 1 nungi 12 tashi kaketshirtem nem kaket agütsütsü atema headmaster aser headmaster-in-charge ajak nem tetuyuba agütsüogo" ta Tripura education minister Ratan Lal Nath-i metetdaksü.

"Ajisüaka, school

melapoktsü aser tesayur 50% tashi school-i aotsü" ta pai ashi.

Headmaster temi kaket alemba mapang teaching aser non-teaching staff kwi arutsü'ar telemtetba agütsü.

"Onoki class 1 nungi 12 tashi atema 68 titles nung kaket lakh 29 order süogo aser tang tashi nung 63 titles atema kaket 27,54,900 tonga aruogo. Ano, title 5 indang kaket 1,45,100 kobi melii atongtsü" ta Nath-isa ashi.

"Class 1 nungi 8 atema title 34 nung English kaket 1,34,200 tashi NCERT nungi indangindanga alizükogo" ta paisa shisem.

### TCI Foundation

TCI Foundation invites applications for the following positions as part of technical assistance to National Vector Borne Diseases Control Programme (NVBDCP), MoH&FW for GFATM supported Intensified Malaria Elimination Project-2 (IMEP-2).

Sr. No	Positions	States
1.	Senior District VBD Consultant (Malaria Elimination Cell, Project Districts)	Arunachal Pradesh, Assam, Chhatisgarh, Jharkhand,
2.	Senior State VBD Consultant-IEC/BCC (Malaria Elimination Cell, Project States)	Manipur, Meghalaya, Mizoram, Nagaland, Odisha, Tripura
3.	Senior State VBD Consultant-M&E (Malaria Elimination Cell, Project States)	

For complete details of the positions advertised, visit <http://www.tcifindia.org/get-involved/employment.html>  
Last date to apply: 5<sup>th</sup> July 2021



**क्षेत्रीय शिक्षा संस्थान, भुवनेश्वर**  
**REGIONAL INSTITUTE OF EDUCATION, BHUBANESWAR**  
(राष्ट्रीय शैक्षिक अनुसंधान और प्रशिक्षण परिषद्)  
(National Council of Educational Research & Training)  
Sachivalaya Marg, Bhubaneswar-751022

### ADMISSION NOTICE 2021-22

Advt. No: 399

Dated: 31.05.2021

The Regional Institute of Education, NCERT, Bhubaneswar will offer the following programmes/courses for the academic session 2021-22.

(1) B.Sc., B.Ed. (Four year)

(2) B.A, B.Ed. (Four year)

(3) B.Ed. (Two year)

(4) M.Ed. (Two year)

(5) M.Phil. in Education

For admission to above programmes / courses except M.Phil in Education, online applications are invited from eligible applicants to appear in common Entrance Examination (CEE). Regional Institute of Education (RIE), Bhopal is the Nodal Centre for CEE-2021. The online application/registration of the candidates for various programmes will be done through <https://www.cee.ncert.gov.in>. The process of application/registration of CEE-2021 is open from 20.05.2021 and the last date of application / registration is 30.06.2021. For any query, please contact CEE-2021 Helpdesk phone numbers 0755-20661467/ 07552661468 or the e-mail ID. [cee2021help@gmail.com](mailto:cee2021help@gmail.com) of RIE, Bhopal.

For admission to M.Phil. in Education, a separate Notice will be issued by this Institute / Utkal University.

PRINCIPAL



# TIR YIMYIM

## YIMOBILEM (EDITORIAL)

DIMAPUR AMUNGNÜ, AAMI (JUNE) 20, 2021

### Obalaibo Kibubasa tenzüksü

**A**lima tensa mejungaka taküm 2021 kuma asenok aikati alima tebutem anogo tongtetogo. Ibai tepelatsü aser temoatsü anogo dang masü saka tebutem asoshi pei kibong aser lokti nung pei teinyaksü shilem indang tali aroka shisadangtsüsa ajuruba anogo tongtibang ka lir. Atangji, soli süli lima alir asünungji, kum tsungda tebutem aika alima nungi pilaogo aser kibong aika nung obala taküm mali ser mezungbuba tebutem anogo monga alitsü. Ibaji temulung shirangtsüka lir saka alima nung masür mali, ajak asütsü aruba purtem lir, anungji shirnok asenok nungi pilaa ogo, parnokji alima nung Teyangluri lemküksüba mapa aser anogo temer ano Teyanglurisa meyipa jar ogo ta bilema, yangji mulung anisungzükdi. Aji oda, tasürbo süogo, parnok mapa tatem, saka asenok akümlirtem asoshiang tebilemtsü tulu, kechiyong asenok alima nung taküm yutsüba tetezüji alima nung asenoki inyaksüba mapa aika lir, anungji item mapatemji rajema inyaksübjiang asenok akümlirtem asoshi khuret asütsü. Tanü obalatem anogo amongdang, tangar ajak dak alaka, obalatem alima nung Tsüngremi taküm yutsüba nükjidongji angatetsü merangtsübjaji kanga tongtibang lir. Oba ta asütsüsa taküm jenjang aser anogo ajuruba tamatsüji joko nisungbaji tain kumogo, anungji nisung tain ka ama kibong anitsü aser lokti nung alitsübjaji nisungia aser Tsüngremia imlar. Tebutem anogo asünungji, jungaka mejungaka, tetsü aser tanurtemi tebu nem tenüngsang agüja peladaksütsü merangtsü. Ajisüaka, tebutem asoshi tebutem anogo nung ya pei kinungtsü aser chirnurtemi kechi agütsür, koma beshir aser kechi ashir ta asübjaji tongtibang masü saka tebu kati tebutem anogo nung pei kibong asoshi kechi bilemer aser kinungertem dang kechi ashir ta asübjiang tongtibang lir. Aji oda, tebutem asoshi tebutem anogo ya tesüiba anogotem indang bilemdangba aser tarutsü anogotem asoshi pei taküm aser kibong tasü aser tashi itshiba anogo ka asütsüla. Yihusua tambur kümer külen, kenü pai Israel nunger ajak Shekem nung adenshidaksür, nenokbo nenok tenzüknuätsü tenzükang, "saka ni aser ozü kibongbo Kibubasa tenzüksü," ta Yihusua 24:15 nung shia anguba ya tebutem asoshi tanü ama tebutem anogo nung shisadangtsüba tongtibang o ka lir. Ibai tebu kati pei kibong agi atishia pei nübortem Tsüngrem nungi mepilatsü ajungshiba dang masü saka Tsüngrem den tesendaktep akangshiba o ka lir. Iba anogo nung Yihusuai Israel nungertem dang, parnok kum ishika jakdang Egypt nung alar süa aliba tia nungi koda Tsüngremi temerem tzüim aser Yordan ayong agi takong kuma sadanger süidaksü, parnok nem tsükchir tesashi madak koda takok agütsü aser alinük tajung nung chiyongtsü talubosa jangratema chiyongtsüsa Tsüngrem taochi agi Israel nunger anitetba anogotem indang parnok dang ashi, idangji Israel nungertemia Tsüngrem temeim bilemtet aser parnokia Abraham, Isak, Yakob, Mosa aser Yihusuai amangba aser tenzükba Kibuba Tsüngremsa tenzüksü ta nangzük. Yihusuai Israel nunger Shekem nung adenshidaksüba anogo ya Israel nunger ajak asoshi asentenshiba anogo tuluka liasü. Iba asentenshiji Yihusuai tesüiba anogotem nung Tsüngremi Israel nunger timtem aser tetsüba tia anungi anitetba indang bilemtetdaksüba ajanga adok. Ashiko, Yihusua mali asübo, Israel nunger ya len tom nung Kanan lima metongjungi Paran arem nungi Egypt leni meyipa orr lila, kechiyong Mosai Kanaan lima ladangtsü asoshi Israel nunger kidong shia nungi nisung kaka yokba nungi Yihusua aser Kaleb natiang Kanan limaji alima kanga tajung aser yangji aliba aso tulu tsükchirtemji akoktsü ta Israel nungertem tasü itdakja ashiba Züngdangba 14 nung asenoki angur. Aji oda, Yihusua ya Tsüngrem temeim mamai Pa tenzükba tasü tait lenir ka dang masü, saka kibong mesütsü atema Tsüngremi mamatzü aser ninang mojitsü agi sünga aliba lima agütsütsü lemkükja aliba reprangtetba tebu ka liasü. Tanü asenoka asen taküm bilemdangra, tebu ka aküm tashi nung, Tsüngremi Israel nunger Egypt alar tia nungi anitetba ama, asen taküm aser kibong makamait, timtem, maksü aser shisabolu tensa tia aika nungi aniteta anisungzük jenjang kati anir aruogo. Aji oda, tanü asenok aliba tia aser jenjang ya asen dak malangba jenjang aser temoatsü lir, kodang asenoki item tesüiba mapangtem nung Tsüngremi aniba otsütemji bilemteta, kinungertem dang nenoka koba ama kibur ka tenzüksüar, "obalabo, asenok ajak alar akümtsüba tia nungi anitetba Tsüngrem Kibubasa tenzüksü," ta shitetra, alima nung tebutem anogo amongba shitakba tesemji asen kibong aser asen mulungjangji asütsü. Aji oda, tebutem anogo ya tebutem sangdaksüba anogo dangbo masü saka tebutem ajak asoshi Kibuba den tesendaktep akangshiba anogo ka südaksüdi.

## OLEMSABANG

### TEBUTEM MOATSÜBA ANOGO SANGRO KA MEJEMTSÜR

- T. Kikanaro Jamir, Retired H.M Singal Angami Dimapur

Nungküm ken ka, obalatem anogo tulu nung obala bilemteta terongjem ken ka tenloktsür.

Apijemtsü 16:31 kupu apuba kolaji sentsüwangshi korang

Obala Lipok Alizüng Telongtet Nukla.

Kü temeim Obala na menungraseter!

Konang aser tetushi nü nem agütsür, taremsük aser shisataka rongsen nü nem agütsür, taochi aser ariabilem teka ritsüng nü nem agütsür, tanü na arishi talang moatsüogo. Nai alizüng tonga asemogo. Na temeshi sobutsü renembaji ozüi meteter, nai onok toktsür temeshi Hon yimti jagi aotsüba nü nukla ozü tenüki angur.

Libanon yimti nung azüngtsü ama, Nür japasotem cedar süng aküm taket medem, Nür jalatem olive süngdong ama teronem onsara tanang, sangshia aoba teburjunga yimti yimdong ajak azüa angur.

Tanü Obalatem anogo Koda TULU!

ür jala japasotem chiyungtsü tetiyubaji Tsüngrem O liasü. Pa nükrang temeim agi oda lendong shisabulu, tarendaksü ajak sushidaksür.

Pa tenutsü nung kotak teyimla ozüi zülua angur.

Pa temeim temile anatsü nok techira ama onok shisabulua alidang ayipzuka yoker.

Pa tebang temeichi-i onok shisabulua shirang yipden nung alidang menuremlokja tzüyim nung aliba sentirongsen oda ali rongsen agi mo-ozuktetba O tem agi ozü mulung sunepdaksür.

Pa tenarong senti O tem asoshi angazükdaksüba techira.

Arura aliba mulusongzü ama lendong nung pai Pa tekolak aungma atur, Posu ama ajemalua Pa temeim tekolak aungumzuka aludang asen kibong nung tesünep agütsür.

Kibong nung jala, japaso ayatsüra den shisabulu khurettem nongloktsü dang OBALA ajemalu tesüngjem mulungjang nung alima khuret ajak remdaksür.

Kü temeim obala nü mulung zürepdaksüba ozü mashi malu tatok agüjangma.

Pa tesüsa, ayatrem shirang, maka mait tia ajurudang Khrista kangki tuyubaji obala liasü.

Pai Tebu Tsüngrem dang sarasadamba kodanga manen. Obala kotaker shisatsü nung yangsemba shiti bener ama ozüibu asadangtsü makoker. Nü nukmen mezüngdangtet tesadem.

Tenemtem, pongmangtem, terongjen tia, mangyimba aser konang naroküm ka ken, ka ken ta ajentsü. Saka obala temeimbo sentsüperang anüi tekong, tenem sangwadaksüba ama alitsü.

Pai par ki kilemji masadangtetba tasazük agi subanger, aji ochisanen manung taremsük aser tejongnü milendong temeim agi longa jara donga renemer.

Aji par lipok alizüng telongtet nukla.

Yangji temeim taribi meshi azünger aser hon tang taoba jala, jabasotem pa temeim taka jagi tarutsü putu asoshi ayanger aser angunnur, aji pa akümli alizüng tasü tait tenangzüktepba lir.

Pa pangtak kintem aser pa alidak menden yimli ajak kibuba taochi ochi artsüngi len tuyuang agi ozü sarasadem. Tongpang makok tashi anü ama marakzüi nokdaka alisang

OBA. Tsüngremi obalatem arishi moajangma.

AMEN.

### OBALA MALI RONGJENSETER

- Sünjemtula Longkümer  
Longpangtsüng Ward, Changtongya Town.

Ochi mulung, tongmelang tamang agi;  
Khrista agizükba temoatsütem.  
Khristan kibong tajung dangi;  
Jala jabaso temsüa angubatem.

Tanela süngjang, nai bushi nung;  
Ne dak item ajak yangsemlok.  
Tsüngrem tenangzükba nai metet nung;  
Ne mulungsentsü Kiburi agizük.

Oba, ne tapubang nung ni mener;  
Ne süpok nung ni ponger yimdongsüa aoba menungraseter.  
Mopung tanep ama ne ola, aser temeim o ni mamar;  
Oba, na mali kanga rongjenseter..!

Oba....ta jashia ni kidangi arudanga;  
Ühüm...ta nai aketsema hau..ta langzuka.  
Metsü mapang Pako ozü ola mesüka;  
Ne ola asangsang nung kodang angashitsüaka.  
Pei bang agi masü saka bendanger bang agi;  
Ne jakla ajungba jembiani.  
Item tapayutsü sempet nukla nung ngudagi;  
Oh iba süngjangji alimai ajangzük tetra ta longrarani.

Kibong aser lokti lungzük na;  
Tanü onok nok kong aitsü?  
Nabo tanü longritzü nung teka metsüker ogona;  
Ammang milen zükrepogoni ya shibai sangwatsütsü?

Tsüa oba, nai ajungba yari mesüaka ya agizükangma,  
Oda naro tebhong ka agi,  
Na semdangi arur, nai langzüangma,  
Ne leper kümbang nung nokdaker, kü nuktzü molutzü ama yimdagi.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## USCIRF nung chair, Nadine Maenza aser vice chair Turkel shim

USCIRF Chair,  
Nadine MaenzaUSCIRF Vice Chair,  
Nury Turkel

**Washington D.C., June 19 (Agencies):** Mapang talangka nungi meimchir temeden atema inyaka arula, Nadine Maenza, 2021-2022 küm atema United States Commission on International Religious Freedom (USCIRF) nung Chair shimbaji ICC-i pelaa agizüker, ta International Christian Concern (ICC)-i sangdong ka ajanga metetdaksü.

USCIRF Chair shimba sülen Maenza-i, "Ni maneni alima tesem ajaklen religious freedom amokmeren anema raratsü," ta nangzük.

Laisa, lai US sorkar ketdangsertem ajurua USCIRF indang mapatong ajak inyaksü yongyar, ta metetdaksü.

2018 küm la USCIRF nung shimoka liasü, aser iba mapang nungjagi tenzuka lai USCIRF-i sponsor asüba conference aika

nung adenba den külemi Egypt, Saudi Arabia, Myanmar, Bahrain, Indonesia, Iraq, Azerbaijan, Syria, Thailand, Taiwan aser Uzbekistan linüktem nung minority religious groups temeden atema inyaka aruogo.

Maenza-i Middle East nung aliba linük aika nung inyakdanga aruogo, anungji iba region nung religious freedom atema inyaksüji la atema mapa tasen ka masütsü.

USCIRF nung Vice Chair menden atema Nury Turkel shim. Maenza ama Turkel-ia meimchir temeden atema mapa aika inyaka aruogo, aser pa ya asalentong junga yanglur ka lir, anungji pa iba commission nung vice Chair shimba ajanga alima nung religious freedom jenjang tajungba akümsü imlar.

Turkel ya tamalen Time

Magazine indang '100 Most Influential People' nunga züngsema liasü. Pai China nung Uyghur nunger temeden atema inyakba ajanga iba narokum angu.

Turkel aser Maenza nati senteper China nung Uyghur nunger anema inyakba nokdangtsü atema inyaksü wadang tulu lir.

International Christian Concern (ICC) Director of Advocacy, Matias Perttula-i, "United States Commission on International Religious Freedom Chair atema Nadine Menza shimba aser Vice Chair Nury Turkel shimbaji ICC-i kanga pelaa agizüker. Tena lenisüba nung USCIRF-i mapa tajung jenti inyaksü aser alima nung religious freedom jenjang tajungba akümsü onoki imlar," ta metetdaksü.

## Uganda linük nung Muslim nungeri pastor, Francis Obo tepset

**Nairobi (Kenya), June 19 (Agencies):** Uganda linük nung Muslim nunger dang sayutsüngiba atema June 11, 2021 nü arrshi küm 70 pastor ka tepset, aser Muslim nunger kati pastor tepsetba nangzükogo, ta osang ka ajanga metetdaksü.

Mpingire Sub-County kübok Odapako yimdak aliba Mpingire Pentecoastal Revival Church Ministries International nung pastor, Francis Obo aser pa kinüngtsü na June 11 aonung 8:30 ako meta market nungi kidangi meyipa aruba mapang Muslim nunger telok kati tena soita liasü.

Osangbener den jembidang pastor kinüngtsü, Christine Obo-i, Muslim nunger rongnung kati pastor dang, na mamanger ka aser nai Muslim nunger dang Islam yimsü toktsütsü ajungshiba den külemi nai Tsüngrem atalar, anungji tanü Tsüngremi na o bendanger, ta ashi.

Laisa, "Parnok rongnung kati kü dang nabo oadokang ta ashi. Ni iba tesem nungjagi metre ishika pilaa aoba mapang nung ni kü kinüngbu ola angashi, aser pa taküm lendong nung lir ta ni meteta liasü," ta ashi.

Lai o-a mejembiteti kidangi tsübuseta meyipa aoba sülen lar chirnurtemi la hospital kati anir ao; tasüngnep la temang tajungba akümba sülen ang lai lar jabaso tambusang dang, nübu Muslim

nungertemi tepsetogo, ta metetdakja liasü.

"Onok iba tesemji tonga aoba mapang nungbo Khristantem aser kinünger aika tasümgang anasa nokdaker mangyima angu," ta lai ashi.

Police-i iba tatalokba bushisüngdanga mapang nung Imam Uthman Olingha dak melung melemi apu; pa dak alia nisung ka tenüng agi, Jafari Kato-a apu.

Pastor kinüngertem dang police-i, Olingha-i pastor tepsetba nangzükogo, ta metetdaksü.

"Olingha-i pastor tepsetba pasasa nangzükogo aser iba atemaji pai mesasar ta shiogo. Muslim nunger dang yazü jembiba atema mamangertem ajak tepsetang, ta Allah-i ashiba ama pai pastor tepset ta pai ashi," ta police-i metetdaksü.

Pastor, Christine Obo-i kinüngtsü den tanur 14 toktsür süogo. Pai iba region nung Arogo 17 tashi ketdangsüa liasü.

Pastor Obo-i mapang ajak nung kiyong aser temeket nung aliba Muslim nunger den Khrista osangtajung lemsatepa aru aser Muslim nunger aika Khrista dangi meyipdaksüogo, ta pa kinüngtsüisa metetdaksü.

"Pai Muslim nunger Khrista dangi anir arubaji Muslim nunger kari tenük yoka liasü, aser pa dang Muslim nunger Khristan

yimsü dangi memeyipdaksütsüla ta amokmerena liasü," ta lai ashi.

June 4, 2021 nüa pastor aser kinüngtsü nati taoba mapang Islam tesayur ka kidang anendaksü aser par Arogo nung jembidang pai pa Khristan akümba taküm kuli lemsatepa liasü.

"Hokolbar nikongdng tekülem sentong agiba mapang nung Muslim nunger kar Tenla ki ajanga süidang pai Tenla kidang Arabic oshi nung jembibaji angashi. Ibayongji parnok Tenla kidangi arua reprangdang. Pai Yisu Khrista ji Kibuba ta jembibaji parnoki mamangteti liasü. Parnok meyipa aoba sülen Muslim nunger lenirtem dang iba osangji metetdaksü aser ibaji ajanga kü kinüngbu tepset," ta lai metetdaksü.

Arogoi taoba mapang Sheikh (Islamic tesayur) nem micro-enterprise livestock project ajanga tajangzük agütsüba ajanga Muslim nungeri Arogo dang kanga jashia liasü.

Uganda nunger linük temzüng nung religious freedom temeden agüja lir, aser iba nungji pei tamangba yimsü tangar den lemsateptsü aser tamangba yimsü melentsü atema sensotem nem temeden agüja lir.

Uganda nunger nütsüng shilem 12 shi Muslim nunger lir, aser parnok timbaka linük anüdoklen tsütsü lir.

## ANO GO ABEN TSÜNGREM DEN

## JUNGJUNGA MEYOKTEP

*"Aser ochi nungi parnok tenarong meyipa otsü dangi aotsü, ibala mapang arutsü. Saka nai ajak nung teshisadang liang, timtem aremang, sayutsüngir mapa inyakang, ne tenzükba mapa abensajang!" (2 Tim. 4:4,5).*

Yohan Baptitsüba pa mapa nung kanga nendaka jangraba tenzük ka liasü. Kwikati Yohan ama tenzük parnok ajak Yisu sülen anidakterem aküm. Tanü azüngba Lai nung ajemdaker Yohan Baptitsüba aser tanü Khristan tenzükertem temetemdanga kar agütsür.

1. Yohan tetsü pok nung alidang nungi Tanela Temeshi agi sünga liasü, saka tanü sayutsüngirtemi shirnok teperi ogo parnok tanela den sendakteper. Tsüngrem O pa dangi aru (Lk. 3:2); saka parnok dangi jungkai adokba aika zülua aliba Tsüngrem O den meputeper. Pa lisem lima nung alir ka, nungtuku aginüba ajak nungi pilaa liasü, mepushi (Mt. 3:1); saka parnoki yimti nung alitsü meimer, aser konang bushir.
  2. Yohan Tsüngrem nungi aruba ola ka liasü (Yn. 1:23), saka tawa tanü sayutsüngir temesükteper kar ola ongetang lir. Pai tenla sapang mebushi saka nisungtemi pa bushi anungji pa osangji tangar den memeyokteper (Mt. 3:5, 6); saka parnok tenla sabang bushirtem lir aser parnok sayutsüngi dang parnok osang tajung masür aser tanaben majar.
  3. Kodang nisungtemi pa nungi angashi parnok temenen nungi temulung meyip (Mt. 3:6); saka kodang nisungtemi parnok nungi angashir parnoki parnok nem tenüngsang agütsür. Pai obendanga yakta arutsü ta ashi aser tangashirtem kümdangdaksür (Mt. 3:10); saka parnoki tarutsü temoatsü, azükaru indang jembiba aser parnok temulung lemdaksü.
  4. Pai temulung memeyipba yimsü nung lenirtem dang per chirtem ta aja (Mt. 3:7); saka parnoki temulung memeyipba lenirtem dang parnok tashi mait aser nungdak mashir.
  5. Yohani Alima Tesangwa asoshi kuli asü (Yn. 1:8,9), saka tawa tanü ainkartemi mangdang nung asüakümer. Pai Yisuji temenen bener Aosang aser Temeshitetsür ta sayu (Yn. 1:29; Mt. 3:12); saka parnoki Yisuji tebilemetsütem Bentetsür ka dang ta sangtonger.
  6. Pai sayatenya kecha meinyak saka Kibuba asoshi nüburtem renemdaksü (Yn. 10:41; Lk. 1:16,17); saka parnoki sayatenya nung jangrar aser nisungtem memelenshii toktsür. Pai nüburtem dang parnok akaba nungi noklang shilem nung tenembo sensaker nem agüjang ta ashi (Lk. 3:11); parnoki nübur dang parnok ter shilem agüjang ta ashir aser parnoki temoatsü aginüra tenla agüjang ta zülur.
  7. Chubai nüktapangtaba asoshi pai chuba arütsü (Lk. 3:19-20); parnoki ochi mashi politician nem tenüngsang agütsür aser parnok maangka bushia sübokrem agütsür.
  8. Pai ashi, "Pa (Yisu) ulutsüla, saka ni asotsüla" (Yn. 3:30); saka parnoki Yisu tenüng nung parnok dak rangloker. Pai Pa nütsüngtem dang sarasademtsü sayu (Lk. 11:1); saka parnoki parnok nütsüngtem dang kechisarena ajak ratetta zülutsü, atangji tenlaa dena, ashir.
  9. Pai chiyongtsü tongmelang chiyongtsü chiyong aser tongmelang sobutsü sobu (Mt. 3:4); saka parnoki lalushibonga sobur iba jagi tongmelang tamanger ratadaksür.
- Ni alidak Yohan Baptitsüba ama tongmelang taküm lia Alima Tesangwa asoshi ochi kuli süa alitsü yariang, Oba. Amen.

## Obala nem aküm tetushi agütsüba anogo tajung

Oh Oba, nü nem aküm tetushi agütsüba tetemjen anogo tulu nung na onok den nü arishi tajung maoja aliba yong onok koda pelaseter aser Tsüngrem tenüng tali asanger. Oba, oda nü taküm khen meyipa reprangdanga, anü, ita, petinutem tesangwa agi alima ajunga sangwadakja aliba metem.

Oba tanü na arishi tajung maoja aliba yong, yipru mopung tesashi arua koda masüba tetsübuttsü lendong tulu ajuruaka, na onok den aliba yong nü aküm nung onok tetsübu tatenten kecha mali, oda onok mulungjang anisüngzuka liteter.

Oh Oba, nü taküm ya kecha dena asadangtsü makok, oda arem mein nung süngti sung akümbanga nokdaka aliba den saku aser nü taküm ya onok asoshi aküm olura aser kibong nung nü aküm ya tzüyim tulu nung rongnir tongti tajung ka mesük. Yamaji oda na arishi maoja aliba mechi onok mapang ajak nung nai akümbanga litet, anungji nü akümlü nung na arishi talang maojang ni ta tanü onoki kanga dang temulung taroktiba agi sarasadema amunger, Amen.

- S. Repa Pongner, Mon Bosti, Assam.

**OLONG PAITEP # 5850**

1			2			3			4	
			5		6		7			
8										
			9							
	10									
								11	12	
			13				14			
15						16				

- |                                                 |       |                             |       |
|-------------------------------------------------|-------|-----------------------------|-------|
| <b>TIPILEN</b>                                  |       | <b>LANGTSÜNGLEN</b>         |       |
| 1. Anenzükdak ki                                | - (5) | 1. Reprangdaksü             | - (4) |
| 3. Asür mangyimba                               | - (5) | 2. _ _ _ ur                 | - (3) |
| 5. Temulung nung shisadang                      | - (5) | 4. Kiojen yangludak         | - (6) |
| 8. T _ _ _ lu                                   | - (3) | 6. _ _ _ _ _ ait            | - (7) |
| 10. Takdang temalen                             | - (9) | 7. Nagaland nung ayong ka   | - (5) |
| 11. Tesa _ _ _ a                                | - (3) | 9. Küm kasa purtem          | - (5) |
| 13. Ajungbena temulungjang<br>tongtonglatsü atu | - (5) | 10. Tetsüng tajemetdak      | - (6) |
| 15. Tejen lai nung tesayur                      | - (5) | 12. _ _ _ _ adenshi         | - (4) |
| 16. Tsüngsak-mopung                             | - (5) | 14. Tsünüsenbongtsü adokdak | - (3) |

**OLONG PAITEP # 5849 TELANGZÜBA**

- |                                         |                                        |
|-----------------------------------------|----------------------------------------|
| <b>TIPILEN :</b>                        | <b>LANGTSÜNGLEN :</b>                  |
| 1. Kasa, 6. Rangben, 7. Mait,           | 1. Khu, 2. Süjak, 3. Onük, 4. Oba,     |
| 9. Poktet, 11. Ati, 13. Atasa, 16. Rür, | 5. Anü, 6. Ratet, 7. Mozü, 8. Ita, 1   |
| 17. Rajang, 20. Lanu, 24. Nüngjem,      | 0. Tar, 12. Tinu, 14. Salem, 15. Aja,  |
| 25. Süra.                               | 18. Anünü, 19. Tajü, 21. Ano, 22. Onü, |
|                                         | 23. Kua.                               |



**KOMA SÜLA TELANGZÜBA**

**Q. Private mozü kidang Covid agi shiranger anepaluba jenjang (treatment charges) ya government-i sensaker lenji tera oa latetsü nunga koma süla ?**

Tang-tangbo nija mozükitem nung Govt-I Covid dak sendakba jenjang latetsütsüji tenükentsü tera lir amai bilemetsür. Anungji nija mozükitemi parnok sasa longjemer temoatsü agitsü leman bushiteptsüla. Kechiasur timtem mapang nung lenchi lua yaritepbaji, double- triple masü tenetpen agi shia moatsütsü.

Kanga jungle -C.R.Pongen

Keburi temeim sayutsuba tanga shi govti kechi latetsütsüba yaküm nungi lockdown süa arutang aonsotsü oset ajak nung jenjang parnoki lateta yutsur pei melong agi tang ayok yonga govti kechi ashir private mozü kidang govti kechi latetsütsüba

Lockdown melenya Govt-i sensaker atema tanga teyari sendong tajung kar den Mozü aser Mozükiang ken repringshi nung kanga ajungtsü südi. -ns jr cmd

Government-i latetsü nung kanga ajungtsü saka temalatiba aser tajungtiba jibo government-i Covid asoshi fund kwi sanction asür ajaki shitak amshitsüla. -SMS

Nagaland nung Corona agi shirangertem anepalutsü atema Cemtre sokari sen aikasa mapangshi agütsür. Yakümbo Corona agi shiranger aser Quarantine nung amonger ajak sorkari anepalua yariogo. Taküma kasa Centre nungi sen kasa agütsüdar anungji tesüiba küm ama Nagaland sorkari ajak bendanga yaritsüla ta shidanger. -SMS

Sen yokba hja chinüa lir saka tesadang ka mesüra timba ka dak alaka ajakbo mechitetsüsa. -T Ao

-A. Moa Pongen, Kma

**AO OSHI ANGAZÜKDAK:**

**TANÜ ANGAZÜKTSÜBA OJANG**

**Kangshi**  
(v) merenshia timtemdaksü ( made to suffer)  
\* Sepaitemi auersang puer kanga **kangshi**.

**Kangzü**  
(v) tetsüng agi ali matong arakzüba  
( movement of legs without touching the ground)  
Tanurtem menden nung mena yur kanga **kangzü**.



**Happy Birthday**

**TENÜNG : TEMSUAKUM. I JAMIR.**  
(chuchuyimlang town)

Tasoba Anogo : 20th June 2019.  
Küm : 2years.  
Talidak : Y. Zhimo colony, signal, Dimapur  
Tsüngremi jabaso Temsuakum tasoba anogo nungi küm ana tashi anema len ania arunung Tsüngrem tenüng asanger. Ano maneni Tsüngremi jabaso arishi talang moajang ta sarasademtsür.

- Temiem Oja, Oba & Kinungertem



**NAI-A YA METETTER MA?**

**INDIA NUNG MEZUNG LAPOKBA SCHOOL KAR:**

1. St. George's School, Chennai (1715)
2. Bishop Heber Higher Secondary school, Tiruchirappalli (1762)
3. St.Johns Vestry Anglo Indian School, Tiruchirappalli (1763)
4. St. Thomas' School, Kolkata (1789)
5. Hooghly Collegiate School, Chinsurah (1812)
6. Christ Church School, Mumbai (1815)
7. Hindu School, Kolkata (1817)
8. Hare School, Kolkata (1818)
9. St. Paul's School, Darjeeling (1823)
10. Lycée français de Pondichéry, Pondicherry (1826)

**SUDOKU # 5891**      **TELANGZUBA # 5890**

9	7				2	4	4	3	7	1	5	9	8	6	2
2	4		7	5	9		1					1	6	5	3
1		6	8	4	2	9						9	2	8	6
	6		4		1	5						8	1	3	2
			3	2	6		8	1				2	7	9	4
	1		5	9	7							5	4	6	8
					4		3					6	9	1	7
	8		1		5		4					7	8	4	5
4					8	1	9	5				3	5	2	9

**OJANG LUTEP # 5435**

- LOTEK :
- NGNU :
- ARK :
- ZÜKKÜMA :
- ÜDAYUNNG :
- EMTAT :
- NGBNUO :
- NGAAJU :
- GSENÜNN :
- GIA :

**OJANG LUTEP TELANGZÜBA # 5434**

**TANGARI MEMETETBA ASER MANGUBA JEMBI MASÜ AJAKI METETA ALIBA JEMBI**

**TAN HOPTA ATEMA - KOMA SÜLA ?**

**Q. Food & Civil Supply department nungi Relief jang ya magütsü anen nunga koma süla ?**

Olong 20 shi nung June 25, 2021 tashi nung iba telangzüba ya onok dangi (e-mail - tiryimyim@gmail.com) :  
(SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzübatemji taruba Honibarnü adoktsütsü.



June 19, 2021 nü Thane nung aliba Thane Municipal Corporation indang Global Covid Hospital kima doctor tem, nurse tem aser health workers-i longkak aitba noksa nung angur.

### Hopta 6-8 tsüingda Covid wave tasembuba agi India kongshitsü: AIIMS

**New Delhi, Aami/June 19 (Agencies):** India linük nung coronavirus wave tanabuba süngjemba mapang nung AIIMS tongti, Dr Randeep Guleria-i, coronavirus wara agi maneni linük kongshitsü, ta metetdaksüogo. Osangbener den jembidang Dr Guleria-i, taruba hopta 6-8 tsüingda coronavirus wave tasembuba agi India linük kongshitsü, ta metetdaksü.

Dr Guleria-i, "Asenoki wara anema tenokdangbatem agien tenzükogo, saka maneni Covid anema telatetbatem timi mebenshir. Coronavirus mezüingbuba aser tanabuba wave nung atalokba nungi asenoki kecha mangazük ama ni bilemer. Ano maneni lokti adenshir. Mapang tatsüka tsüingda national level nung iba wara proktsü. Coronavirus wave tasembubaji

mepaitoktettsü aser taruba hopta 6-8 tsüingda linük kongshitsü," ta metetdaksü. Tan hopta India nung Delta Plus Covid variant puteter aliba mapang nung AIIMS tongti, Guleria-i iba osang ya metetdaksür. Tan hopta tetenzüklen New Delhi nung scientist temi, SARS-CoV-2 indang Delta variant ya menateptsü melamelar, ta metetdakja liasü.

### June 24 nü Centre sorkari J&K nung party tem den senden amentsü

**New Delhi, June 19 (Agencies):** June 24, 2021 nü Centre sorkari Jammu & Kashmir nung regional party ajak den senden amentsü, aser iba senden nung yimtenren onük aser assembly elections atema jembitsü, ta ketdangsertemi metetdaksü. Iba senden ya Ato kilonser, Narendra Modi leniba nung amentsü aser senden nungji Union Home Minister, Amit Shah densema Central lenirtem adentsü. Iba senden nung adentsü atema Central lenirtemi National Conference (NC) tongti, Farooq Abdullah, PDP chairperson, Mehbooba Mufti, Jammu & Kashmir Apni Party (JKAP) nungi Altaf Bukhari aser People's Conference tongti, Sajjad Lone nungerbo jaokogo. Abdullah aser Mehbooba naprongla ya taoba mapang Jammu & Kashmir state aliba mapang nung Chief Minister inyaka liasü.

Iba dak sendakba nung osangbenertem den jembidang Mehbooba-i, "June 24 nü senden nung adentsü atema ni jaokogo, ajisüaka tang tashi ni telemtetba magi. Ni party nung lenirtem den o lemtepa sülen ang telemtetba agitsü," ta metetdaksü. 2019 küm August ita nung Centre-i Jammu & Kashmir nung state jenjang agiener union territories ana kümstüba sülen tang mezüing Centre-i party ajak den senden amentsü. JKAP Tir, Bukhari-i, "Kong mesüra kodang ayongzükuyonga senden ayongzükubaji ni pelaa agizüker. 2020 küm March ita nung onoki, ken o jembibaji democracy alitsü aser Jammu & Kashmir nem state jenjang agütsü atema dang asütsüla, ta onoki shiogo aser iba nungjagi onoki matsüingshir," ta metetdaksü. Iba senden nungji regional party tem dang masü saka Jammu & Kashmir nung BJP

asir Congress units-a adentsüa akok, ta osang angazüker. Parliament nung Jammu & Kashmir Reorganisation Bill agizükba sülen yaküm February ita nung Justice (ret'd) Ranjana Desai leniba nung delimitation committee ka tenteta liasü aser parnoki tekaraba nung report agütsütsü. 2019 küm August ita nung Jammu & Kashmir nung Arrla 370 agienba aser union territories ana (Jammu & Kashmir aser Ladakh) kümstüba mapang nung Bukhari dak alaka party balala nungi yimtenren lenirtem aika pua liasü. Yaküm District development Council election nung PAGD teloktepi BJP teloktep madak takok tulu ngua liasü. Iba election nung PAGD teloktepi menden 110 nung takok angu. PAGD teloktep nungi menden timba angubaji National Conference (67) liasü aser single largest party ji BJP (menden 75) liasü.



June 19, 2021 nü New Delhi nung Congress lenir, Rahul Gandhi asoba anogomong nungtem nung Indian Youth Congress Tir, B V Srinivas-i sensakertem nem rations agütsütsü renem dang tangokba noksa nung angur.

## India-i Myanmar atema renemba UNGA bangzüng nung vote magütsü

**United Nations, June 19 (Agencies):** UN General Assembly (UNGA) nung Myanmar atema renemba bangzüng nung India-i vote magütsü.

Draft bangzüng nung India-i lemsatepa onük densema mali, ibayongji India-i vote magütsü, ta India-i metetdaksüogo.

Hokolbarnü UNGA-i Myanmar atema bangzüng ka renema, "Myanmar nung sepaitemi nüburtem taginüba akhümtsübuttsüla aser 2020 küm November 8 nü general election osang akhümtsübuttsüla linük nung emergency anentsüla. Myanmar nung meimchir temeden akhümtsübuttsüla aser democratic yimya nung tentetba Parliament lapoka democracy yimsütsüba alitsüla, aser iba nungji sepaitem densema national institutions ajak dendaktsütsüla," ta metetdaksü.

Iba bangzüngji agizüka linük 119-i vote agütsü, Belarus linüki iba bangzüng magizüki vote agütsü aser India, Russia aser China densema linük 35-i vote

magütsü. Myanmar atema UNGA nung vote magütsüba kuli metetdakja India-i, "Tanü benoktsü aliba draft nungji onoki lemsatepa onük densema mali. Kidanger linüktem aser region nung aliba linüktem dak sendakba onüktem atema tebilemba lemsatepa tajungtiba nung inyakttsüla, ibaji onok tangatetba. Alima linüktemi iba onük ya yimjung nung bentettsü atema ibaji inyakttsü tongtibang," ta metetdaksü.

"Kidanger linüktem ajaki aser region nung aliba linük aikati iba bangzüng atema vote magütsüba nungjagi tangazüktsü lir; kanga aritepa telemtetba agirtem atema iba ya tangazüktsü ka asütsü imlar," ta India-i ashi.

"Tang ama tensa ka nung iba bangzüng benokba ya menüingdak, aser iba ya ajang onoki Myanmar nung democratic inyakyim tajungba akümtsü atema yarisema inyakba nung timtem agütsütsü. Ibayongji onoki vote magütsütsüsa aküm," ta India-isa metetdaksü.



June 19, 2021 nü Jammu nung Jammu & Kashmir State Road Transport Corporation (SRTC) nung mi lendong atalokdang sepaitemi mi enseptsü merangba noksa nung angur.

### India nung Covid agi teshirangdakpur 7,60,019 dang kümogo

**New Delhi, Aami/June 19 (Agencies):** Tesüiba ghonda 24 tsüingda India linük nung ano nisung 60,753 dak coronavirus putet aser iba tashidak agi nisung 1,647 süogo, ta Honibarnep Union Health Ministry-i metetdaksü.

Tang tashi nung linük nung nisung ajak agi 2,98,23,546 dak coronavirus putetogo aser iba tashidak agi nisung 3,85,137 süogo.

Tanü agi anogo 37buba India nung anogo shia coronavirus agi shiranger anepba dang nungiba iba tashidak putetba tajemba; iba tashidak agi shiranger shilem 96.16 (nisung 2,86,78,390) anepogo, ta Health Ministry-isa metetdaksü.

Tang linük nung coronavirus agi teshirangdakpur 7,60,019 dang kümogo, aser ibaji testiiba anogo 74 tsüingda

teshirangdakpur ishitiba lir. Tang tashi nung coronavirus vaccine dose 27,23,88,783 agütsüogo aser Hokolbarnü samples 19,02,009 tendangba densema tang tashi nung samples 38,92,07,637 tendangogo.

Tesüiba ghonda 24 tsüingda coronavirus agi shiranger 1,647 asüba nungji Maharashtra nung 648, Tamil Nadu nung 287 aser Karnataka nung nisung 168 asüba densema lir.

Tang tashi nung linük nung coronavirus tashidak agi nisung 3,85,137 süogo aser nisung timba asüba state temji- Maharashtra (1,16,674), Karnataka (33,602), Tamil Nadu (30,835), Delhi (24,900), Uttar Pradesh (22,081), West Bengal (17,240), Punjab (15,771) aser Chhattisgarh (13,368) state tem lir.

# Ebrahim Raisi-i Iran tir election kokogo Palestine nunger aser Israel Police na tsüngda mangatettep adok



Ebrahim Raisi

**Tehran, Aami/June 19 (Agencies):** Iranan nunger ultraconservative Ebrahim Raisi-i, Honibarnü tir election kokogo aser Hassan Rouhani ket nungi iba mapa August ita belenzüksü renema lir.

Critics temi ashiba agi, lenir tongtibangtem kar disqualify sütsüba ajanga pa jenjang junga aküm, ajisüaka pa pusemertem atemabo pa ya anüolen aliba linüktem anema nokdaksü aser linük rongsenketsüng timtem nung aliba anitetsü atema timla tulutiba lir.

Raisi ya tangar puaba nisungkabo masü saka judiciary tekolakba amai pai ochi mashi ketdangsertem aika obendangtsü atema nungtugu campaign ka tenzüka liasü.

Election atema nüboyimba mapang pai, ochi mashi inyakyim anema maneni raratsü, tekübokba jenjang nung aliba kibongtem atema ki tasen million pezü yanglutsütsü aser Iran tashi itshidaksütsü atema nüburtemi tongtibang shilem agiba sorkar ka amenoktsü nangzüka liasü.

Iran nung media outlet aikati pa ya supreme leader, Ayatollah Ali Khamenei melenzüker asütsü ta bilemer, shiba taruba ita arishi küm 82 ajungtsü.

Raisi, shibai turban tanak asemer iba ya Islam indang ainketer Mohammed nungi indang indanga jakzüka

temaitsü lir aser pa nem "hojatoleslam" naroküm agütsür lir, koba Shiite clerical hierarchy nung Ayatollah dang nungi jenjang ka agi tekübokba lir.

Tanga ultraconservatives tem ama paia, 2015 küm US tir Donald Trump den nuclear dak sendakba nung tenangzüktepba ka meyanglutetba atema Rouhani'er telok aija aruogo. Iba janga Iran nem maneni tenokdangba agütsüshia timtemi ai.

Raisi-i, Iran rongsenketsüng kanga mejungi kümer aliba nungi anitetsü atema iba tenangzüktepba ya asendenshir yanglushitsü pusema arudar.

Raisi ya 1960 küm Mashhad temeshi yimti nung aso aser lanur asüba mapang temaba jenjangi atu.

1979 küm Islamic Revolution tenzüksü lia arishi küm 20 asüba mapang Raisi ya Tehran kidanger Karaj indang prosecutor-general asütsü shim.

Bendanglen oa jenoka aliba opposition lenirtem aser rights teloktem atemabo, 1988 küm Marxists aser tanga leftists tem aika tepseta intokba den pa tenüng ya sendaka lir. Iba mapang nung pa Tehran nung Revolutionary Court deputy prosecutor liasü.

2018 küm aser taoba küm nisung tepsetba indang ashishiba mapang Raisi-i iba

tatelokba nung pai kecha shilem magi ta shiogo. Paisa, Islamic republic ngutetsang Ayatollah Ruhollah Khomeini-i tetuyuba ajak agüja liasü, ta ashi.

Nisung tepsetba atema aser rights telok anema inyakba tanga taitsuba dak ajemdaker US-i Raisi ya tenokdangba agütsür aliba lenirtem rongnung züngoksem.

Raisi-i, 1989 nungi 1994 küm tashi Tehran indang prosecutor-general mapa inyak, 2004 küm nungi tenzüka küm ter tashi Judicial Authority deputy chief mapa inyak aser 2014 küm national prosecutor-general asütsü shim.

Pa Khamenei kübok theology aser Islamic jurisprudence azüng aser pa indang official biography ajanga ashiba agi, pai 2018 küm nungi Mashhad nung Shiite seminary ka nung tesayuba balala agüja arudar.

2016 küm Khamenei-i, Mashhad nung Imam Reza shrine achaayangba aser industrial aser property asset portfolio azüokba charitable foundation ka ketdangtsütsü atema Raisi shim.

Küm asem lir Khamenei-i pa Judicial Authority tekolakba asütsü shim. Raisi ya supreme lenir shimba mongintem rongnunga densema lir.

Pa Tehran indang Shahid-Beheshti University nung educational sciences lecturer Jamileh Alamolhoda den kibong aküm aser tena jala ana lir.

Raisi ya Ahmad Alamolhoda tanük lir, shiba Hokolbar sarasadem Iman aser Mashhad atema supreme lenir tenüng nung nokdaker lir.

2017 küm election nung Rouhani makokba sülen taküm pai election koktetogo. Taküm election nung ultra-conservatives pongu aser reformists ana tokteptsü atema temelaba agüja liasü.

**Jerusalem, Aami/June 19 (Agencies):** Hokolbarnü sarasadem tembangba sülen Al-Aqsa mosque kima Palestine nunger longkak aiterterem aser Israel police na tsüngda mangatettep adokba sülen longkak aiter asem yiruogo.

April aser May ita iba tesem nung mangatettep aika adokba sülen taoba ita Gaza nung anogo 11 raraan liasü. Iba tesem ya Islam nunger atema temeshitiba tesem tasembuba aser Jews tem atema temeshitiba tesem lir, shirnoki iba tesem dang Temple Mount ta ajar, kechiyong iba tesem nung laishiba mapang temple tem amenoker liasü.

Iba tesem nung Israel aser Palestine nungertem mapangshia mangatettep adoker, ajisüaka Hokolbarnü tatalokba nungbo police temi compound telungi mei kanga azüzüka inyakogo, koba sorkar tasenba tetuyuba asütsü ta bilemer. Red Crescent emergency service-i ashiba agi, iba tatlokba nung Palestine nunger lanur ana rubber injang agi yiru aser ka long agi yiru.

Palestine nunger lanurtemi compound kima aliba police tem dak long agi aon aser parnoki meyipar longkak aiterterem dak stun grenades pokloksüba den rubber injang agi akha.

Mongolbarnü Jewish

ultranationalists temi rally ayongzüka agiba anema Hokolbarnü sarasadem tembangba sülen nisung noklang aikati longkak aita liasü. Rally nung shilem agirtemi Arab nunger südakjang aser nenok yimtsüngtem rongdakjang, ta yimyim ayima liasü. Mongolbarnü rall agiba mapang nisung kari Prophet Muhammad tilutsüba atema Palestine nungertemi longkak aita liasü.

May 21 nü Gaza rara tembangtsü atema tenangzüktepba yangluba sülen tensa maneni kanga mejungi lir. Mongolbarnü rally ya 1967 küm rara ka sülen Israel-i Old City aser iba kübok aliba temeshi tesem densema Jerusalem anüdoklen atsüngba benjungtsü atema ayongzüka agiogo. Police temi tashiyim agi Palestine nungertem anin aser lokti nem tekümzüka agütsü, kechiyong nüburtem aikati tanga kin anema yimyim ayima liasü.

Kasa mapang nung Gaza nung kiralongrar telok Hamas yimsüsürtemi activist tem anidena item nisungtem nem Israel leni balloon tem yokdakja alu aika rongdaksüdar. Israel-i Bodhbar aser Brehostibarnü tayimtsü agi tesem kar makogo, koba parnoki ashiba agi Hamas indang facility tem liasü.

## Kim Jong Un-i North Korea rongsenketsüng ajungkettsü nangzük



Kim Jong Un (File photo)

**Seoul, Aami/June 19 (Agencies):** Ruling party anogo pezü senden amaneba sülen Kim Jong Un-i North Korea rongsenketsüng kanga mejungi kümer aliba asüngsanshitsu nangzükogo. Paisa linük nung chiyongtsü agi anüngba süoki ia agiba lemsatepogo aser ketdangsurtem dang US den sensaksemtsü aser tokteptsü atema renemtsü shiogo, ta state media KCNA-i Honibarnü metetdaksü.

Kim Jong Un lenisüba nung Mongolbarnü nungi tenzüka Workers' Party Central Committee senden ka menogo. Iba masüadang Kim Jong Un-i sorkar dang United States den sensak asemtsü aser tokteptsü atema renemtsü tetuyuba agütsüogo. Kim-isa, linük nung chiyongtsü agi anüngba

mesemtsü atema jenjang tapet agitsü ayongzükogo aser iba timtem ya coronavirus wara aser taoba küm yipru aitba dak tongloksüogo.

North Korea atema US tir Joe Biden indang special representative Sung Kim-i Honibarnü South Korea semdangtsü lia KCNA-i, Kim-i jembiba o sangdonga liasü. Nuclear dak sendakba nung North den ken o bangdaka aliba jembishinütsü atema Sung-i South semdang. Sung Kim-i, South Korea nunger lenirtem den ajuruteptsü aser Hombarnü Japanese nuclear envoy Takehiro Funakoshi densema trilateral senden ka nung shilem agitsü.

Kasa mapang nung Kim Jong Un-i, Workers' Party nung züngsem tsemtem shimogo. Kim-i lenirtem kar libaliro nung tebilemstü aliba tetuteta ashiba sülen, imlaba ama melitetba atema sasaba item lenirtemi lemsatepa liasü, ta KCNA-i ashi.

Central committee indang politburo-isa, Supreme People's Assembly, Presidium indang tatong tir Thae Hyong Chol züngsem asütsü shimogo aser party indang Central Auditing Commission ketdangsur U Sang Chol, alternate züngsem asütsü shimogo, ta KCNA-i ashi.



Buenos Aires, Argentina nung nüburtemi mapa aser intasen tajungba agütsütsü khanga, 9 de Julio Avenue nung longkak aitba noksa nung angur. Coronavirus tashidak tanaben poktetshir aliba mapang oset jenjang tali akümba aser sensaktia tali akümba anema healthcare worker aser lokti tentet balalai longkak aita liasü.

# CHRISTIAN HIGHER SECONDARY SCHOOL

NYAMO LOTH ROAD, DIMAPUR - 797112, NAGALAND

E-mail: christian.dimapur@gmail.com

Website: www.chssdimapur.com

*We design your child's future*

IN LOVE AND



*We build your child's career*

TRUTH WE STRIVE

## ADMISSION FORMS & PROSPECTUS

FOR CLASS 11

(ARTS & COMMERCE) 2021-22

FOR BOTH BOYS AND GIRLS

AVAILABLE AT THE SCHOOL OFFICE

DURING OFFICE HOUR

FOR QUERY CALL # 7005755299 / 8730071215

BETWEEN (9:00AM - 12:00 NOON)

### SPECIAL FEATURES



1. Qualified, Trained & Dedicated Teachers
1. Summer Bible School
2. Scripture Retreat & Counseling
3. Career Guidance Cell
4. Smart Board Classrooms
5. Hostel for Boys
6. Bus Service
7. NCC
8. Club Activities

NPCC-i Dimapur aser Kohima nung jang-o-tsü lema agütsü



Jang-o-tsü lema agütsüba yangi noksa nung angur.

**Kohima, Aami/June 19, 2021 (TYO):** Honibarnü (19.06.2021) Rahul Gandhi asoba anogomung nungtem nung, Nagaland Pradesh Congress Committee (NPCC)-i Dimapur aser Kohima nung nungdakba pur nisung 700 nem jang-o-tsü lema agütsü, ta sangdong ka ajanga metetdaksü.

Iba 'ration kits' nung jang, lentils, alo, mustard oil aser metsü (salt) dena lir. Dimapur nung nisung 500 aser Kohima nung nisung 200 nem item chiyongsü lema agütsüogo, ta NPCC indang general secretary, GK Zhimomi-i ashi.

Honibar, Congress lennir, Rahul Gandhi asoba anogomung nungtem nung, Nagaland Congress pusemer temi nungdakba purtem nem

jang-o-tsü lema agütsü, ta sangdong nung shia lir.

NPCC sangdong ka ajanga angazükba agi, COVID-19 tanabuba wave' aser timtem ajanga, Gandhi-i pa asoba anogomung sentong magitsü lemtet aser külem party pur danga iba anogo sentong/benjung tulu kecha mayongzüksü asoshi pai mepishiogo.

Gandhi-i külem party nung inyakertem dang tangba tensa dak sendakba meratem nung tashi anga anidaksü aser tanabuba Covid-19 wave ajanga timtem nung alirtem den nungdakba pur tem ang yaritsü asoshi mepishia liasü, ta NPCC sangdong ajanga metetdaksü.

Rahul Gandhi asoba anogomung nungtem nung,

Dimapur DCC office nung SOPs mera ajak nung anidaka sentong tilaka ayongzuka liasü, kong state party president K Therie-i telok den jemiogo. Iba sentong temer sülen, DCC Dimapur, NSUI Nagaland ase NPC Minority Department densema team pungo agi Dimapur jila telungtet tesem balala nung nungdakba purtem nem jang-o-tsü lema senzü.

Maneni, Kohima nunga PCC aser DCC office ketdangpurtem den Nagaland Pradesh Youth Congress (NPYC) longjemer Congress Bhavan nung nübodok mapa ayongzük aser iba sülen Kohima jila telungtet nung nungdakba pur tem nem parnoki jang-o-tsü lema agütsü, ta kasa sangdong nung shia lir.

### MULUNGNEN O

Aso:  
1910



Asü:  
09.06.2021

#### ASÜR ZULUTEMBA LONGKUMER (Küpza)

Tanü Na onok den meliaka nü sayubentsü, shisatsü aser mapa tajungtem onok den teti alitsü.

Pa arishi küm noklang ka tema Chirnur aser Semchirtem asoshi akhüm agüja moatsü nung Tsüngrem tenüng maneni asanger. Kija, kibong aser lokti kwinkati ozü dang temeim aser aria bilema mapa tajung sayuogo, nenok ajak dang kinungertemi kangasa pelaba lemsateper. Tsüngremi nenok ajak maneni moajangmata onok sarasadem.

~ Temeim Chirnur, Semchir aser Kinungertem.

### MULUNGNEN O

"Kechiyong asenok taküm lira, asenok Kibuba atema taküm alir; aser asenok süra, asenok Kibuba atema asür. Anungji asenok süaka, mesüra taküm liaka, asenok Kibuba meyong"

- Rom : 14.8

Nenok shibaisa pa meteta, meim aser akümtsüba liasü, wara tesashi liaka nübu, sarasadem, rongsen aser tajungshi o agi ochi temeim tatem salem MR. S. AKANG AO (CHUCHUYIMLANG, WARD 9, CHUMUKEDIMA) nem agütsü, ozü mulungjang taroktiba nungi pelaba lemsateper. Nenok mulung nung aser sarasadem nung onok bilemtetba atema kanga pelar. Tsüngremi nenok ajak moshia moajangma.

~ Temeim Kinungtsü, Chirnungertem, Semchirtem, Anük Abang aser Kinungertem.



(28.05. 1944 - 27.05.2021)

### Euro 2020: England aser Scotland na draw nung tembang



London, Aami, June 19, 2021: Euro 2020 - Group D nung England aser Scotland asayaba mapang tangokba noksa ka yangi angur.

London, Aami/June 19, 2021 (Agencies): Honibar, UEFA Euro 2020 asayamung - Group D nung England aser Scotland asaya liasü. Team kati danga goal meinoktsüteti iba asaya draw nung tembang.

Iba asaya nung England pur kanga agi tajungba asaya aser parnoki kidanger team den meranga toktep, saka Scotland puri England nem goal idaktsütsü maongka magütsü aser parnoki iba asayamung

nung shilem agia arur mezüing point nguogo.


Telok ana tsüingda asaya tenzüker, England nungi defender John Stones-i minute 12buba nung goal idaktsütsü maongka angu, saka pai tongoktsüba ball ji post nung ondak. Ano külen, Scotland atema Stephen O'Donnell-i goal ka metsüloksütsü merandang, saka goalkeeper Jordan Pickford-i tom nung ball ajepzükadok.

Break sülen, Mason Mount-i metsüloksütsüba goal ka Scotland goalkeeper David Marshall-i nokdanga liasü aser tesemdang team (Scotland) nungi Che Adams-i minute 78buba nung goal ka idaktsütsü maongka ngua ball dak metsüloksütsü, saka goal post adena ball tukadok.

"Iba asayamung tenzüker tanü onoki junga asayaogo. Group nung onoki temaba jenjang ajangzüknar. Onoki point anguba den ang taruba round atema qualify asütsü ana nung dang lir,' ta asaya temer sülen England captain Harry Kane-i ashi.

Goal ka danga menguteti draw nung tembangaka, England team maneni asayatsü lenmang lir. Tang Group D nung Czech Republic (4) sülen England team (4) tanabuba jenjang nung lir. Mongolbarnü England aser Czech Republic na tsüingda asayatsü. Iba Group nung Scotland aser Croatia napronglai point ka ka ngua lir aser kasa anogo Glasgow nung team ana asayatsü.

### Copa America: Argentina-i goal 1-0 agi Uruguay akok



Brasilia, Aami/June 19, 2021: National Stadium, Brasilia nung Argentina aser Uruguay tsüingda Copa America asayaba mapang, Guido Rodriguez-i Argentina atema goal idaktsür sülen pelaba noksa nung angur.

Brasilia, Aami/June 19, 2021 (Agencies): Copa America asayamung nung, Guido Rodriguez teyari ajanga, Argentina-i goal 1-0 agi Uruguay kokogo. Guido-i international asayamung 11buba nung shilem agir alitsü.

1989 küm nungi Copa America asayamung nung Uruguay-i Argentina pur khen danga kokdanga mali aser iba asaya tenzüker minute 13buba nung Guido Rodriguez kolak agi mezüing goal idaktsüba ajanga goal 0-1 agi tesülen ser asaya.

Real Betis nungi midfielder asayasang Guido-i 2019 küm June ita nungi Argentina atema mezüing asayatsü tenzüker aser tan Copa America asayamung nung pa dak sempet aliba mapa agi sayuogo.

Brasilia kübok National Stadium nung iba asaya tenzüker minute 10 sülen Lionel Messi ajanga metsüba cross ball ka Guido-i agizüka Argentina atema mezüing goal idaktsü. Iba goal ajanga Argentina-i point asem ngua Group B nung parnoki temaba jenjang tongtetogo.

"Iba asaya akoktsü onok dak langa lir. Parnok (Uruguay) nem goal magütsütsü tebilemba nung, tanü onoki junga asayatsü merang. Onok rongnung asayar tajungtem dena lir aser parnoki asaya mashi ka nung telok atema goal idaktsütsü akok," ta Argentina midfielder Rodrigo de Paul-i ashi.

Brasilia nung terepranger medeni telok ana tsüingda asayaogo aser Uruguay puri point ka danga menguteti table punglanglen Bolivia tejaklen lir.

Iba Group nung Bolivia-a match ana asayaogo aser parnoki asaya ka danga takok mangu.

Kasa Group nung Argentina pur point pezü tashi ngua temaba jenjang tongteta lir. Chile-i 1-0 agi Bolivia tsükdakja point pezü nguogo aser parnok tanabuba jenjang tongtetogo.

Paraguay-i asaya ka nungi point asem tashi nguogo. Striker Edinson Cavani-i taoba asaya ana nung shilem magiba sülen, Hokolbarnü Uruguay atema pai asaya liasü.

2019 küm Copa America semi final nung Argentina tamakok anguba sülen, par teloki asaya 15 tashi nung khen danga tamakok mengudangi asaya arudar.

"Taoba asaya kar nung tia makai onoki takok mangu. Ajisüaka, Copa America nung teti dang toktepa asayar telok den tanü onoki junga asayatetogo," ta Argentina indang substitute Angel Di Maria-i ashi.

"Tanü tashi Copa America nung Brazil team tajungtiba lir. Onoki takok anguba ajak ya mera ka ka agir ama lir aser onok mangdang kodanga mesamatsü. Onoki iba mangdang ataloktsütsü teimla lir. Iba title atema Argentina-i küm shia meranga asaya arudar, saka Brazil nung iba asayamung asayar aser parnoki kanga dang junga asayadar," ta Maria-i shisem.

Maneni, Copa America nung, Hombarnü Argentina-i Paraguay den asayatsü. Kasa anogo Uruguay aser Chile asayatsü terenemba lir.

### WTC Final: India team-i asür Milkha Singh nem akhüm agütsü

Southampton, Aami/June 19, 2021 (Agencies): Ageas Bowl nung New Zealand team den World Test Championship final asaya nung, Honibarnü India cricket team nung asayar ajaki 'armband' tanak inoka asür Milkha Singh nem akhüm agütsü liasü.

Hokolbarnü, Chandigarh hospital nung Covid-19 wara dak sendakba timtem ajanga Milkha Singh arishi küm91 nung asü.

New Zealand captain Kane Williamson-i toss akok aser mezüing batting asütsü shim. Asaya moapu nung team anaprongla nungi asayatem pei pei linük naklo ken atema noktak aser India team puri armband' tanak inoker liasü.

"Milkha Singhji, shiba COVID-19 tashidak ajanga iba akümüli nungi pilaogo, pa nem akhüm agütsü aser pa bilemteta #TeamIndia-i armband' tanak inoker," ta Twitter sangdong ka



Southampton, Aami/June 19, 2021: Honibarnü, Ageas Bowl nung India aser New Zealand tsüingda World Test Championship final asaya tenzütsü lia, India team-i asür Milkha Singh nem akhüm agütsü 'armband' tanak inokba noksa nung angur.

ajanga Board of Control for Cricket in India (BCCI)-i metetdaksü.

India captain Virat Kohli-ia Twitter ajanga asür Milkha Singh nem akhüm agütsü liasü.

"Tajung dak rangloker nükjidong ayutsü asoshi pa taküm ajanga linük ajungshio. Takok magu tashi tezü metangi inyaktsü aser pei mangdang nung rangloker tejakleni aotsü asoshi pai sayuogo. #MilkhaSingh ji na tesünap nung anisüingzükanama. Alimai na kodanga mamatettsü," ta Kohli-

i lemsatop.

Milkha Singh-i Asian Games nung pezüben tashi gold medal angu aser 1958 Commonwealth Games nunga pai takok tajung angu. Ajisüaka, 1960 küm Rome asayamung 400m final nung pai pezübuba jenjang nung takok anguba ya ajak dang tulutiba liasü. 1956 aser 1964 Olympics nung India tenüing nungi pai shilem agiogo aser saisapong wadang tsütsü pai Singh-i shilem tajung agiba atema, 1959 küm pa nem Padma Shri award agütsü.

### Virat Kohli-i 'Test' asayamung nung alizüing tasen ka tongtet

Southampton, Aami/June 19, 2021 (Agencies): Southampton kübok Ageas Bowl nung New Zealand team den tasayadak aliba World Test Championship final - Test cricket asaya tanünübuba (Honibar) nung, India captain Virat Kohli-i alizüing tasen ka tongteta otsü yangluogo.

Test asayamung nung run 7500 tashi kara yangluteter cricket asayar rongnung Kholi tukububa kümogo.

Iba alizüing tongteter India nung cricket asayar rongnung, Kohli ya pezübuba alitsü. Kasa jenjang ya taoba mapang asayar Sunil Gavaskar-ia tongteta lir. Pai innings 154 nung Test run yangluogo.

Sachin Tendulkar-i Test

innings 144buba nung iba alizüing (runs 7500) tongteta liasü aser iba list nung pa temaba jenjang tongteta lir.

2019 küm, Virat Kohli ya India cricket captain ama shim aser India captain ka ama Test run timba yangluteter rongnung pa küma, pai Sunil Gavaskar indang record ajateta liasü. Gavaskar Test captain inyaka asayaba mapang, pai Test run 2426 yanglua lir.

\* Test asayamung nung run 7500 tashi takaratiba tongteter asayatem (India):-

- 144 innings: Sachin Tendulkar
- 144 innings: Virender Sehwag
- 148 innings: Rahul Dravid
- 154 innings: Virat Kohli\*
- 154 innings: Sunil Gavaskar

Kasa mapang, Kohli-i India

captain ka ama Test asayamung timtiba nung shilem agir asayar ka küma, pai MS Dhoni indang record ajatetogo. New Zealand team den India World Test Championship (WTC) final asayamung ya India indang captain ka ama Kohli atema Test asaya 61buba alitsü.

Dhoni-i captain ka ama Test match 60 nung shilem agiba sülen, 2014 küm December ita pai Test cricket asaya nungi anen. Cricket asayar Asia linüktem nung, mapang talangtiba Test captain inyaker rongnung Kohli alitsü. Sri Lanka indang taoba captain Arjuna Ranatunga aser Pakistan indang captain Misbah-ul-Haq nati pei pei team atema Test match 56 nung shilem agiogo.

## BILEMDANGANG

"Tenükmeremer tsüingdang tajung achitetba mali."